



Ravnopravnost spolova je ključna za ostvarivanje napretka na polju poštivanja osnovnih ljudskih prava i razvoj demokratskog društva koje teži poštivanju vladavine prava i ekonomskom rastu u BiH.

U BiH osnovna načela rodne ravnopravnosti propisana su Zakonom o ravnopravnosti spolova BiH. Prema ovom Zakonu svaki nivo vlasti je obavezan da vrši analize stanja ravnopravnosti spolova i preduzme odgovarajuće mjere za otklanjanje postojeće neravnopravnosti, te su stoga kantonalni gender akcioni planovi najefikasniji način za ispunjenje ove obaveze. Do sada su gender akcione planove usvojili Srednjobosanski kanton i Kanton Sarajevo, a Općina Novo Sarajevo je jedina općina koja ima važeći gender akcioni plan, dok se u ostalim općinama zagovara na usvajanju lokalnih gender akcionih planova.

JEDNAKOST

GAP BiH izrađuje se u skladu sa Zakonom o ravnopravnosti spolova BiH, ali i prethodnim gender akcionim planovima, je dokumentima kojima su utvrđeni međunarodni standardi u oblasti ljudskih prava žena i rodne ravnopravnosti, kao što su Strategija za ravnopravnost muškaraca i žena Evropske Unije, preporuke Vijeća Evrope, Evropske unije i konvencije, rezolucije i preporuke tijela Ujedinjenih naroda.

Dosljedna primjena ovog Zakona, te vršenje analiza i predlaganje mjera za unapređenje rodne ravnopravnosti i ljudskih prava osigurava se Gender akcionim planom BiH i pratećim planovima na svim nivoima vlasti.



Gender akcioni plan BiH je strategija koja sadrži niz programskih mjera za uspostavljanje ravnopravnosti spolova u BiH, njenim entitetima i Brčko distriktu, za ostvarivanje ravnopravnosti spolova u svim područjima društvenog života i rada, u javnoj i privatnoj sferi. Gender akcioni plan praćen je nizom dokumenata neophodnim za njegovu implementaciju, kao što su operativni planovi za implementaciju Gender akcionog plana entiteta, te lokalni (kantonalni i opštinski) gender akcioni planovi.

Među prioriternim oblastima Gender akcionog plana su sprečavanje i suzbijanje nasilja na osnovu spola, uključujući nasilje u porodici i trgovinu ljudima, rad, zapošljavanje i pristup ekonomskim resursima, javni život i donošenje odluka te daljnje jačanje saradnje na regionalnom i međunarodnom nivou.

